Svjetska konferencija o akvakulturi

Ovu konferenciju organizirali su zajednički Svjetsko društvo za marikulturu i Evropsko društvo za marikulturu sa ciljem da se u svjetskim razmjerima što realnije ocijeni stanje akvakulture u morskim i slatkim vodama, s obzirom na sadašnju proizvodnju, dostignuća, teškoće i perspektive. Ti aspekti razmotrени su u svjetlu rezultata istraživanja, predviđivih pravaca razvoja i komercijalnih efekata. Konferenciji je prisustvovalo oko 1200 učesnika iz gotovo svih zemalja u kojima postoji značajnija akvakultura. U radu su učestvovali najeminentniji stručnjaci iz svih nauka koje se koriste u akvakulturi.

Rad konferencije odvijao se u plenarnim zasjedanjima, panel diskusijama, poster sekciji i trgovinskoj izložbi. Za vrijeme boravka u Veneciji učestvovali smo u radu svih ovih dijelova konferencije.

Na plenarnim zasjedanjima održana su 23 referata (i diskusija) koji su obuhvatili gotovo sve aspekte akvakulture. Prisustvovali smo zasjedanjima na kojima su izneseni pregledi o stanju i pravcima razvoja akvakulture u svijetu i njegovim pojednim dijelovima, skupinama organizama (ribe, raci, mekušci, bilje, planktonski organizmi) koji se uzgajaju sistemima akvakulture, reprodukciji i uzgoju mlađa, hranidbi, unošenju novih vrsta organizama i bolestima. Nakon našeg odlaska zasjedanja su obradila sva ostala glavna područja akvakulture.

Upoznali smo se s referatima koji su prikazani na oko 170 postera. U njima su obrađene pojedinosti iz svih područja akvakulture. Od panel diskusija, naše zanimanje pobudila je rasprava o strategijama za unapređenje akvakulture u zemljama u razvoju.

Na izložbi je izlagalo oko 50 izlagaca iz zemalja Zapadne Evrope i SAD. Spektar eksponata i materijala obuhvatio je knjige o akvakulturi, razne sisteme proizvodnje riba (naročito kavezni), hrane za ribe i tehničke uređaje za hranidbu, projekte projektnih organizacija, razne aparate, uređaje i opremu za ribogojstvo i uzgoj školjaka, programe osiguravajućih društava za osiguranje u akvakulturi, strojeve za ribarsku preradi-vačku industriju itd.,

Konferenciji je prisustvovala brojnija ekipa jugoslavenskih ribarskih stručnjaka, znatno više iz područja marikulture što je i razumljivo, jer su ti problemi dominirali. Međutim, i stručnjaci s područja slatkovodnog ribarstva imali su što čuti, vidjeti i naučiti.

S konferencije smo donijeli opsežan materijal — sažetke svih referata, te niz prospekata, što će nam sve veoma koristiti za naš budući rad u naučnim istraživanjima i programiranjima razvoja naše jugoslavenske akvakulture.

Smatramo, da je konferencija bila dobro planirana i da je ispunila svoj cilj. Može se reći, da smo i u tom pogledu sakupili dosta informacija i dosta naučili. Stoga je naše prisustvovanje u njenom radu bilo veoma korisno.

Dr Nikola Fijan, svezuč. prof.